


Psicologo Tony Green a presenta su buki riba menopausa

ORANJESTAD - Ayera mainta den sala di Biblioteca Nacional Oranjestad e prome buki na Papiamentu riba e topico di menopausa a wordo introduci na e comunidad di Aruba.

Den presencia di su distinguida mama, sra. Mary Green y su señora, Mary Green, hunto cu varios invitado e.o. amigonan, famia y miembronan di diferente organizacion den nos comunidad, psicologo y autor, Tony A.D. Green, a introduci su buki "Menopausa: Su implicacionnan y maneho".

A toca sra. Mary Green, na kende e buki ta dedica, pa simbolicamente bautiza esaki segun e traduccion Arubano. Green a scohe pa usa strooitjes di papel pa e acto di bautizo enbez di champagne manera ta nos custumber.

E obra aki ta bira un material



bibliografico di consulta pa esnan interesa riba e tema interesante aki.

Pasobra e buki Menopausa: Su implicacionnan y maneho ta sumamente completo cu informacion riba kico exactamente ta menopausa, kico ta e sintomanan, con pa maneha menopausa unabez cu e manifesta su mes. E buki tin un capitulo dedica na e aspecto psicologico di menopausa, tambe tin un capitulo cu e preguntanan mas haci y nan

contestanan.

Tambe e buki ta contene un glosario cu ta yuda den busca e nificacion rapido di cada palabra tecnico y medico usa den e buki. Na final di e buki e autor ta inclui tambe un lista di bukinan cu esun cu kier sigui lesa por busca pa mas informacion.

Tony Green ta trahando actualmente caba ariba su siguiente produccion cu lo ta un buki na Ingles e biaha aki cu lo contene consehonan cortico ariba un variedad di topiconan.

Esaki segun Green ta programa pa sali na final di e luna di September proximo.

E portada di e buki ta un reproduccion di un pintura ariba oleo di Tony Green cu ta muestra otro faseta artistico di e autor.

Menopausa: Su implicacion y maneho ta primiti di bira un best-seller nacional. Busca esun di bo na Prince Smart y algun copia na e empresa di sr. Alex Croes, esta Giani's Nutrition Center den Hendrikstraat, promer cu nan caba.